

# Dos dia mas pa hobennan entrega potret pa expo "Show the King"

ORANJESTAD (AAN): Comision Bishita Real 2013 ta anuncia cu a alarga cu dos dia mas e "deadline" pa entrega di potret pa participa den e expo "Show the King". Manera ta conoci dianan 20 y 21 di november awor Rey Willem-Alexander y Reina Máxima ta riba un bishita oficial na Aruba. Den cuadro di esaki a organisa un evento pa hobennan di 14 pa 24 aña, di cual un parti ta dirigi riba e vision cu nos hobennan tin pa Aruba aki 20 aña y e otro parti ta e debate cu e mesun tema.

E entusiasmo a cuminsa crece bou di hobennan den e ultimo dianan pa cual e comision, despues di contacto cu diferente scol, a dicidi di pone dos dia extra pa e hobennan entrega nan potret.

Cu e lema "Show the King", hobennan ta haya un oportunidad unico pa comparti cu Rey Willem-Alexander nan ideanan tocante e "Aruba di futuro". Cu un exposicion di potret y un debate nan ta duna nos Rey un idea con Aruba lo

mester ta aki 20 aña, ora cu nan a yega e edad cu nos Rey tin awor.

Nan por haci esaki, sacando un potret cu nan "smartphone" y manda e potret hunto cu un descripcion di no mas cu 250 palabra. Lo haci un seleccion for di e potretnan mas impactante. Durante e bishita real lo presenta e potretnan cu a selecta den un exposicion. Nan ta hunga un rol importante tambe durante e debate hubenil den cua 2 ekipo lo presenta nan vision, nan lo debati cu otro y finalmente nan ta trata na bini cu un vision colectivo.

Den poco palabra, cu inventividad y creatividad propio papia y skirbi, e hobennan ta duna Rey Willem-Alexander un impresion dinamico di nan plannan pa Aruba.

Tuma nota cu e deadline awor pa manda e potret pa [showtheking@gmail.com](mailto:showtheking@gmail.com) ta 13 di november awor.

Rey Willem-Alexander for di momento di su inauguracion

a expresa un interes grandi pa tur loke ta pasa na e otro partinan di Reino y por nota cu seis luna despues cu el a subi trono ya caba e ta bishitando e partinan Caribense di Reino.

Ademas di e Debate-Expo, lo tin e recepcion di bon-bini dia 20 di november pa 10'or di mainta dilanti Bestuurskantoor, cual ta un evento publico. E mesun dia lo tin e evento na San Nicolas, unda pueblo tambe por mira e yegada di Pareha Real na Sta. Theresita Center, pa su encuentro cu hobennan di 14 pa 24 aña. E mesun dia tin e Anochi Real na Bushiribana, e concierto publico, cu ta wordo presencia pa e Rey y e Reina.

Pa mas informacion por subi riba e website [www.bishitarea12013.aw](http://www.bishitarea12013.aw) of riba Facebook Bishita Real